

Kempen Kesedaran Risiko Empangan Bukit Merah

Oleh: Nurhidayati binti Mat Daud

Pada 31 Oktober 2019, seramai 38 orang staf FKA yang diketuai oleh Ketua Pusat Pengajian iaitu Dr Haji Anas bin Ibrahim telah disambut oleh pasukan JPS Daerah Kerian di bawah pengurusan Jurutera Daerah, Ir. Safuandzi Bin Abdullah untuk menjayakan program khidmat masyarakat bertajuk Kempen Kesedaran Risiko Empangan Bukit Merah di Pejabat JPS Empangan Bukit Merah.

Empangan Bukit Merah merupakan empangan tertua di Malaysia yang mula dibina pada tahun 1902 dan siap pada tahun 1906. Empangan ini pernah dinaiktaraf pada tahun 1967 dan 1984 untuk meningkatkan kapasiti takungan. Objektif kempen ini adalah untuk memberi kesedaran kepada penduduk yang tinggal di hilir empangan tentang risiko dan tindakan kecemasan yang perlu diambil oleh mereka jika berlaku bencana. Kempen ini termasuk di dalam Pelan Tindakan Kecemasan Empangan Bukit Merah. Kempen ini telah dijalankan secara berkumpulan dengan setiap kumpulan bergerak dari rumah ke rumah. Lapan buah kampung yang terlibat terletak di hilir empangan iaitu Kg Parit Air Hitam, Tali Air Kanan, Parit Mat Keling, Kg Tanjung Bugis, Abu Hassan Ban, Kg Padang Lalang, Kg Batu 38 dan Ban Pisang. Penduduk telah diberi penerangan berkaitan empangan, fungsi empangan, risiko tinggal di hilir empangan, kesan bencana dan langkah-langkah menghadapi bencana. Terdapat siren kecemasan yang dipasang di kawasan berhampiran dan mereka diminta peka terhadap jenis bunyi siren supaya tindakan yang diambil



adalah cepat dan tepat bagi menyelamatkan nyawa mereka. Kempen tamat pada jam 3 petang dan telah mendapat kerjasama yang amat baik daripada penduduk. Pihak FKA UiTM CPP amat menghargai peluang kerjasama ini dan berharap kerjasama seperti ini akan dapat diteruskan di masa akan datang.

